

Ken ta Doño?

Promé tabata ABB. Anto a bira 2% “omzetbelasting” (OB). Awor ta 5% OB. I diferente sífra ta skeiru kuantu e kosto di bida lo subi en realidat (12% òf 25%). Un kos ta sigur: nos tur tin ku hala faha mara.

Ku tantu inkietut finansiero den nos komunidad, ta importante pa nos tin un perspektiva korekto pa ku plaka. Por haña esaki den e manual di bida, Palabra di Dios.

Beibel ta papia hopi kos tokante sèn. Ma awe nos ke pensa tokante e konsepto finansiero **prinsipal**. Maske e konsepto finansiero ta símpel, e ta afektá bo delaster sèn!

Kiko ta e konsepto finansiero tan importante? Símpelmente: **Dios ta Doño di tur kos**. Beibel ta bisa bon kla: “*..na SEÑOR bo Dios ta pertenesé shelu i e shelu di shelunan, tera i tur loke tin den dje*” (Deuteronomio 10:14). “*Tera ta di SEÑOR, i tur loke ku e ta kontené, mundu, i esnan ku ta biba den dje*” (Salmo 24:1). Si Dios ta Doño di mundu i tur loke ta den mundu, esei ke men **E ta Doño di tur BO poseshonnan i plaka**.

Talbes esaki aki ta spantábo! Ma e ta bèrdat, si bo gusta òf laga di gusta. E konsepto aki ta inkluí sigur tres implikashon revolushonario pa ku bo finansa.

1) Si Dios ta Doño di bo poseshonnan i sèn, **abo no ta doño**. Si bo no ta doño, kiko bo ta anto? Bo ta solamente mayordomo. Un mayordomo ta manera un atministradó, un hende ku ta manehá sèn òf poseshonnan di un otro persona. E mes no ta doño.

2) Si Dios ta Doño di bo poseshonnan i plaka, anto bo mester **maneha bo finansa manera Dios ke**. Segun 1 Korintionan 4:1-2, un atministradó mester ta fiel ku poseshonnan di e doño. Pues, **loke Dios ta bisa ta loke bo mester hasi!** Nos guia no ta buki di un super-sensashon ku a logra bira mionario komo hóben òf un guru finansiero. Nos guia ta e Manual di Dios.

3) Si Dios ta Doño di bo poseshonnan i plaka, **Dios por duna òf kita for di bo loke e ke ora e ke**. Doño di plaka—no e atministradó—ta disidí kiko e ta hasi kuné. Ora un invershonista ta disidí di bende su hotèl na nos isla i invertié otro kaminda, nos ta yor’è pa keda. Ma finalmente **ta su sèn**—e por hasi kuné **loke e ke!** Dios, siendo Doño di e sèn den bo poder, por dunábo mas òf E por kit’è di bo! Pues, ora preisnan ta subi òf bo ta sufri pèrdida finansiero, no tin nodi di sapatíá! Dios ta Doño! **E por hasi loke E ke ku Su sèn! No ta bo sèn!**

Sigur e konseptonan aki ta revolushonario! Nos ke sa ku nos sèn ta di **nos**. Nos ke sa ku nos por hasi loke nos ke ku e sèn den nos poseshon. Nos ta sapatíá ora nos tin ku paga mas, ora nos ta pèrdè plaka òf poseshonnan.

Sin duda, esaki ta un manera totalmente distinto pa mira bo poseshonnan i sèn. Ma e no ta un perspektiva irealistiko. E punto di bista aki lo duna pas sabiendo ku Dios ta den kontrol di bo situashon. Bo por drumi trankil sabiendo ku Dios sa ku bo a hala faha mara te ku no tin mas buraku. E lo sòru pa bo nesidatnan.

Ma, pa esaki por ta un realidat, ta esensial pa bo hasi loke Mateo 6:33 ta bisa: “*..buska promé e reino di Dios i Su hustisia, i tur e kosnan aki lo wòrdu añadí na boso*.” E promesa aki ta válido solamente ora bo ta pone Dios promé den bo bida...ora bo ta konfia Kristo so komo bo Salvador i ta hasiE Rei di bo bida!

En bista di e nubianan skur na horizonte ku ta indiká ku mal tempu finansiero ta na kaminda, ta importante pa bo tin un perspektiva korekto pa ku poseshonnan i plaka. Bo perspektiva ta determiná dor di e manera bo ta kontestá e pregunta: Ken ta doño, abo òf Dios?